



華泉集六

告文
祭文
哀辭

~16
1034
6

六



和6
1034
卷6



華泉集卷之十一目錄

告文

黃江書院廟庭豎碑告由文

告大齋俞先生彥鏤文

文氏三世白洞祠奉安告文

告鳳溪土地神文

告五代祖考晚悔堂府君墓文

逸休亭追奉文正公真像告文

開寒泉院基告由文

告王考文正公墓文

告先考妣墓文

告叔氏教官府君文_二

告亡室揚州趙氏墓文_三

告家廟文

祭文

正宗大王魂殿進香祭文

祭大齋俞先生_{彥鑠文}

祭左議政俞忠文公_{彥鎬文}

祭鄭判書_{存中文}

祭閔公紀_{鍾顯文}

祭趙仁叔_{鎮宅文}

祭李文之_{學永文}

祭趙曾一_{宗詰文}

祭趙仁卿_{元詰文}

祭洪履之_{義綏文}

祭李敬命_{義肅文}

祭俞曼倩_{漢雋文}

祭旺林李公_{行祥文}

祭柳生_{景漢文}

祭外舅參判退軒趙公文

祭外姑貞夫人安東金氏文

祭姊兄徐公翼修文

祭姊兄鄭大哉元綏文

祭黃婿大中基瓚文

祭金婿容玉炳珪文

華泉集卷之十一

告文

黃江書院廟庭豎碑告由文 戊午

尤翁之門天挺先生學問德業尤翁是程曰敬與直
傳授要旨華陽有廟亦粵志事動靜語嘿疇非成法
真知實踐猶懼不及有背斯文在墻而麾孔轍顏巷
殊跡同歧卷懷林泉爲世山斗草樹含馨江山不朽
睠彼故宅寒水秋月咫尺遺宮牲繫猶關經之營之
有來衿紳誰其銘者尤翁之孫之德之盛發揮得大
中庭有屹穀朝于妥卽事之始恭伸文侑無我斃遺

百世啓佑

告大齋俞先生 彥 鍊 文 乙 巳

云云後學三州李采焚香再拜告于大齋俞先生之靈自哭山頽奄及祥月一部宙衡嗟志未卒雖曰未卒亦既成書乃知我祖托付不虛小子敢忘顧言如昨賴有賢季實相其役自始及終旬有五日以校以勘以底完帙先生有靈其永有辭恭陳厥由一慟而歸

文氏三世白洞祠奉安告文 并春秋○丁卯 享祝文

烏山之文顯于忠宣忠宣之裔世美相傳孝哉友谷

暨白草公伯仲其行州里聞風熒然在疚卉木不華行路尋常亦識其家江左三殷海東二連家食求志所讀聖賢宛彼故居百世遺芬久而采彰薦紳之文有號磊村克繩祖武禮以居恤年甫勺舞閉戶讀書隨時而晦逾臣射天倡義成隊猾胡入郊却食有詩擎天蹈海素志在茲一門三偉名著草野鄉人起慕禮合祭社瞻彼白洞江城遺院別剏新宮其舊亦繕曷不于茲尸而祝之吉日斯妥秩秩其儀兄及弟矣有肖厥孫薦此荔桂永矢不諼

惟孝友于是弟是兄爲後人慕寔鄉先生 右友谷 位各塵

江城有孫友谷之季常棣並輝白草著異

右白草堂位名

參

行祖曾閔志師文魯一門三賢邊豆有楚

右磊村位名成

質

告鳳溪土地神文

惟茲鳳溪一村三綱碑楔并列非乏表揚以雨以風
剝落路傍余莅茲土感慨激昂謹為高麗忠臣冶隱
吉先生孝子弘文著作襄公節婦金氏烈女藥哥營
立四架屋以庇旌閭今方開基畧薦酒果以冀神佑

告五代祖考晚悔堂府君墓文 乙丑

舊有隧表是府君 贈吏曹參判時所立及其加
贈議政則宜有改建之舉迄至百三十年事力未遑
采以祖父文正公所撰陰記始敢手書他石其前面
集韓滂大字茲趁中秋節祀以刻以豎以卒我父祖
未卒之志庶幾使府君實德實行不至寢遠寢微為
世世子孫師法不勝感慕今因有事茲并高其封築
新其莎草伏惟尊靈不震不驚謹告

逸休亭追奉文正公真像告文 丙寅

維茲花田實基我李忠憲舊宅遺像在此文正有真
獨未揭虔二祖生卒適在是年矧伊三三晬日重回

忠憲公以丙寅三月三日
生文正公亦以丙寅卒爰奉一堂于東于西廊廟

山林其歸在休志伊學顏愛此一區誰曰不宜兩世
七分神理人情宛侍晨昏

開寒泉院基告由文 代院儒作○乙丑

吾鄉有師曰李先生先生之居十有九齡洞號寒泉
學溯考亭出處之正義理之明繩準平直為世法程
清明灑落玉色金聲巍乎道德煥乎文章有來樞衣
自彼遠方羣飲于河矧伊吾鄉門路淵源粵我父兄
惠我後人牖我明誠敢曰私淑慕切秋陽何以報之
苾芬維馨扁楣寶額雖則有煌院仍於社草草門墻

不可以久盍謀永寧迺卜茲地迺經迺營其地維何
山高水長華山之東泉菴之傍文巖衛道圓峯毓精
藏修有所濟濟踰躅一邦文明庶徵地靈何間舊洞
松檟相望絃誦攸基衣履攸藏前瞻忠肅後依文貞
神理所安咸曰允臧于以拓之迨此辰良揀之陜陝
椽之丁丁薦我微悃牲肥酌清維神降歆保佑無疆
告王考文正公墓文

伏以葬先生之日依禮立小石碑只書原官逮丙申
賜諡文正則理宜改豎至今未遑茲因有事先墓乃
易而新之以表阡隧仍窈有所感先生易簣後五十

七年 當壬戌請院請額之疏一籲蒙 恩因其
舊社奉以俎豆其翌年癸亥遺集二十五冊亦刊布
自此先生之道可得以復明於世今年春賴諸士友
力始就老老谷口坐酉向卯之地經紀新祠以本月
二日移奉影幘神版距舊洞不一二里而近而煌煌
四字宛是寒泉故號齋庖苟完衿紳相賀遠邇會者
餘數百人奚但一門一鄉之榮而已采以不肖老且
死了茲二大事庶幾他時可以歸拜我先父兄惟是
墓道諸文字樞衣諸賢零落已盡未有可以揄揚大
德以光斯道者勢須百世之下待其人而後成此不

肖所耿耿齋恨者且念不肖中歲居閒讀先生之書
求先生之志蓋亦十數年顧其間姑就祿仕之計自
混俗利之場者不過爲貧而今則駸駸然怠惰放倒
兼以衰病益甚精力已耗有書不讀讀亦不記舊聞
全疎新知不繼彼一種議論門戶異歧愈久愈失甚
或有半是半非之說而本自不學無以闡明先生之
旨後有子朱子復作義理大明斷案始成則方可使
一世之人曉然知先生之言建天地質鬼神而不悖
無疑也只當尊所聞行所知以俟夫後世之公議耳
伏惟先生之靈哀憐而啓牖之茲并虔告謹告

告先考妣墓文

維歲次戊戌八月日伏以小子不天早失怙恃兄弟姊妹又太半零落惟小子孤瑩無依涕淚爲命半生失學莫遂顯親之願十年食貧不免謀身之計乃屑屑蔭路求霑斗祿以今年六月初十日蒙 恩授永柔縣令莫非先考先妣餘慶所及顧逮養無地專城何樂古人奉檄之喜已矣此生清秋履霜之感嗚呼罔極茲於省掃之日畧薦庶羞之品兼陳衷臆益增痛慕

告叔氏教官府君文

嗚呼痛哉吾叔氏教官公以庚寅四月十二日猝不幸棄世舍弟采客遊關北營中聞訃而悲號奔馳翼月朔日達于西城哭于靈筵至哀結轆無可告訴遂乃抽腸爲文因夕奠告之曰嗟嗟吾兄其真亡耶其或不亡耶弟歸而兄不見弟哭而兄不聞素帷寂寞丹旒掩映鋪筵設几惟有一玄木橫堂天乎人乎此果吾兄耶嗚呼痛哉弟於春間偶出關登元帥臺入七寶山有詩幾十篇紀行且將以某山某水之勝歸詫吾兄至有登臨處處詩無數歸日春燈示四哥之句今焉已矣誰謂數月之間遽作千古耶兄弟不相

會父女不相訣冥冥有知必將飲恨於泉塗說到于此我當如何嗚呼痛哉燈夕之書出自手墨安否之問間以諧謔凡字畫辭教之間別無兆朕之先見者而訃車後一日而踵至實是夢料之所不到者關格雖云急證亦不必盡殺人苟能藥餌及時調治有方倘或不至於斯境而人不用誠有以致之耶抑亦天命有限非人力可容耶若使吾兄在者必將懽迎笑談以敘睽離之懷而此亦已矣嗟嗟吾兄其或知之耶其真不知之耶心隕臆塞縱不能文歸無一言尤非情理之所可忍故草草數行先以告哀嗚呼痛哉

叔氏教官府君立後後告文 乙巳

公亡轉頭易燧十六孰尸其祀哀彼晝哭後死攸責其不在嗣我有二穉當分其季爲仲之老先移二房庶幾增丁主公烝嘗耿結此願上穹鑑只公言謂何歷歷猶記擇宗之議僉同我否遲以數年亦云既久事不從心天也無那仲氏曰噫於今則可疇其可子在驪之澣小子商悅今年十五曷若早定及其未娶伊其所生咸昌爲祖所生之生卽打愚後派同晚悔何遠之有叔兮之嗣先定其伯觀於其伯琴書可托禮部成文自日邊至于孫千億實基於此昔無今有

豈曰不喜獨有遺恨我願莫遂假後螽詵寧可子又公不我尤我心則負是孰使然蓋莫之爲曰父日子其重何如凡厥初生必有前定勿云其疎豈容人勝疎而復親亦理之常持以慰公公庶無傷苟其式穀何必已生抽腸以告涕淚徒傾惟冀尊靈眷佑從今俾壽而昌苾芬是歆

告亡室揚州趙氏墓文

歲在己未十月二十八日癸丑通訓大夫忠州牧使李采方三狀辭官不日西還就亡室淑人揚州趙氏之墓畧具餅果酒饌爲文而告別曰我始出山嗟與

子同以禮之善自善而忠旣飽旣煖斑彩嬉嬉我頌君恩子憂我衰早晚偕隱與我成說十年紫綬千莖白髮矧伊年來荐經喪威萬事惟涕一念圖歸渾眷已還獨奈逝者五斗折腰非余樂也病榻一臥辭單三呈浩然林泉非今則明我且歸矣爲誰挽鹿不見縞衣歸亦何樂來同去否他鄉孤墳我卽一歸便成羈魂姑置死別那忍此離然且有慰我行不遲殆未篤老期以歲再畢竟同穴况千百代典奴占婢子之所使墓戶蒼赤新增三四二宗一客咸家于側俾供掃灑俾勤栽植豈若窮家樵牧無禁一觴告行有淚

盈襟

告亡室墓文

歲次己巳五月日采於丁卯五月拜驪州牧使戊辰三月換授豐川府使其七月內遷左副承旨屢登筵席昵陪 耿光光文於三月拜注書五月移拜檢閱方綾被在直連歲 恩榮闔門感祝惟光正去月哭其婦林川趙氏乃隨柩登程將以明日到此十五日未時就夫人墓隧下十數步地過葬神理人情非不允叶獨奈淑德婉容無由復覲兩房八男次第成長或庶幾悅豫餘生得忘新舊之悲切冀明靈保佑無

疆尙記年前臨歸告墓有曰迨未篤老期以歲再雖未能如約亦嘗歲一往返今也年益老事不從心遂三年而始一至後期遲速有未易質言徊徨愴悼老懷難抑前夜之夢夢見夫人我來此地倘或有相感方因新壙修治之役畧使開敞砂城補平階庭爲陳事由兼道邇來經歷茲以酒果用伸虔告

告亡室墓文

維歲次癸酉十一月日光正以童蒙教官十月二十二日擢增廣文科丙科第十二人及第以科前司果仍爲成均館典籍光裕之第三子壙亦生員三等入

格來自龍楸光憲以本牧出迎遂相率展省成卿以道伯備送官奠以侈幽明愴古榮今喜極而涕仍念夫人之藏卜于茲纔數年而光文黃婿先已聯榜小成後六年丁卯光文光正又爲大小科又六年今日與兩新恩一時榮掃固已耀人耳目而士仰命汝成卿相繼按本路高牙大纛三到瑩域是亦絕罕之事耳世以爲茲山之陰吾則知夫人之德實能啓佑後人而孝友仁睦之報自有不期然而然者自今門戶之吉慶墓隧之榮耀惟夫人之冥隲庶幾永賴謹告

告家廟文 甲戌

采今年七十傳重一事節目未詳雖不得據而準行自今晨謁量其筋力間以數日祭祀之際亦擬陳設後入參粗伸情禮敢告

祭文

正宗大王魂殿進香祭文 代巡使作○庚申

資挺明睿運際熙洽一念典學猶懼不及堯舜禹湯文武周孔祖述憲章發爲功用之典之墳旁及羣書寤寐紫陽悅如黍芻旣抄旣輯購之燕肆理事一體博約兩至不遑周昃乃惜夏陰匪直也勤不顯亦臨萬川明月主翁惺惺自新新民八域休明至哉其德

淵泉溥博煥乎其文雲漢昭倬天人性命暨動植微
靡有不究于以發揮通透灑落何積之盛自始令聞
以基哲命銀印纘統玄袞代理聽於無聲維 寧考
志不泊之悲無樂爲君何以報之斟酌情文咫尺
闕宮月觀日瞻禮伸隆享戒存別嫌情義所裁俟聖
不惑孝爲百源養以一國斯晨斯夕怡我 殿宮推
以及遠惠于宗公虔恭待漏必飭有位無小無大咸
秩百祀遇灾脩省非文伊實本之於學二紀如一凡
厥施措由是做去 君兼師道子視臣庶如影於表
孰敢不正崇道距詖第一王政俎豆祠院玉帛巖阿

一藝一長亦在搜羅國計民瘼周爰咨諏錦玉靡安
雨暘皆憂辛祈必親庚呼則哺蠲貢助婚掩骼收呱
深仁厚澤無遠不屆巍巍蕩蕩何病博濟齋居泣囚
恤哉惟刑好生之德寧失不經苟有不獲若恫於已
農綍糴策靡所不至朝政得失民情休戚靡隱不察
靡微不格煦之濡之以懷以保咸曰父母謂頌載道
獨有鈇鉞明義一部有嚴麟經其義竊取非 后之
忍自干天討邦命旣奠民志乃固日月星辰如彼其
耀霜雪雨露何莫非致矯俗之綸如醉斯醒 宸藻
寓意積雨新晴意在全保嗟世家子無偏無黨惟義

是視賢愚貴賤黜陟賞刑到底精神無或遺忘文教
賁興武畧并備不以疎逖惟器之使其仁如天其智
如神凡我簪衿孰不尊親惟其至善所以化洽言爲
世則行爲世法服御之儉筵臣感歎比隆禹菲奚論
唐澣徽稱未加大德無名謙而益光於千萬齡華祝
方切軒弓遽遺于朝于野如喪之悲寔天不吊奈民
無祿雲鄉已邈 仙馭不復謳謌歸啓 宗祏如磐
其 容深墨哀動瞻觀心法相傳溫文夙就冲年遺
大陟降其佑况有 聖母裘冕東朝類周太任邁宋
女堯發號施令動法前規在朝同寅何憂不治瞻彼

華 園松栢蒼蒼 鑿輅載謁歲以爲常 珠邱卜
吉於昭孔邇永綏孝思允協神理 蹕路如昨廡衛
將造千官雨泣萬姓雷號 天日之表何處更覩學
問文章可四三古親賢樂利於戲可忘倏焉今昔已
矣幽明伏念臣跡阻攀紼誠切薦香庶冀 降歆在
天洋洋

祭大齋俞先生 彥鏤文

癸卯云云大齋俞先生之柩鞠而將葬也前一日乙
丑後學三州李采謹爲文數行奠以鷄絮拜訣于靈
筵嗚呼夫人之哭先生爲斯文也采之哭非直爲斯

文也重以哭吾之私也自我祖陶菴先生棄後學也墜緒漸遠遺文散在中篋先生與朴文獻李陶湖諸公身任闡道之責其志蓋汲汲也及諸公者沒而先生之德之隣於是乎孤矣則先生愈懼其道之不傳也日沉潛聖賢書以究極乎人物理氣之辨要以尊所聞爲心既又訂正其原集序次其諸編尤拳拳乎舊所托宙衡者用力最久未嘗一日而不在手也方先生疾革也采往候之疾已不可爲矣然不以采不肖其一二所未及整理者猶反復教詔也今先生沒矣誰復任其責者此采之哭所以異諸人而別有私

于先生也雖然始之哭吾私正所以爲斯文也則其哭也亦未嘗不同於人也若先生踐履之工造詣之實非采所能蠡測又惡敢妄有稱述不以體夫先生謙挹之德也采以顛蒙雖未及操几而從執經而問顧其慕悅之深卽與二三子者無間焉已乎已乎吾將安放而安依旌翼在門典刑永闕抽腸告訣冀歎斯觶

祭左議政俞忠文公

彥鎬文

歲在戊午三月近故左議政止軒俞忠文公祥日奄迫三州李采方任中州牧謹以十七日辛巳遣從子

華身集 卷十一
光承替奠酒果告之以文嗚呼惟靈清明峻介恬約
精密維忠與文亦既節壹 聖代名相季世完人殄
瘁之悲朝野惟均愚而蒙幸俾也可忘猥論經禮過
加知獎歷辭湖亭九載轉眄二祥將訖一杯遙薦

祭鄭判書 存中文

近故尚書鄭公壽七十八戊午暮春不幸捐館舍三
州李采以門下舊生時在中州任所既爲位一慟服
麻三月及其再朞之前一日朔朝始爲文具茶果數
品告于靈筵曰嗚呼維靈東萊大閎文翼後孫予以
委禽于圃巖門早歲濡染尊信也篤泉上講禮疑問

累牘簡重其資孝友其行風儀白替頎而且靚蔭路
低回非公所筭屢舉而屈何伸之晚出一口氣于後
生叢雖老尚旺志氣不窮謂人若已居今行古銀臺
錦臬薇垣栢府在公倘來曷云展步所不諧俗是迤
邐故卅年晉塗在通塞間然且有天耆社卿班誰之
不若而不華要西塞風雪匪怒伊教豈若是人工於
龍斷門前羅雀輪蹄絕罕城市坐隱玉子丁丁我自
樂此寵辱何驚孫方告慶公遽乘化杖屨之從噫在
泉下年非不高位非不崇別有私公恩摯義隆記余
童時孤煢不才惜也可教以爾笈來館我食我牖我

昏蒙三載誘誨維巖與銅賢妹我嫂姊夫卽胤公視
弟姪我事愈謹非直姻好受知也深何以報之耿耿
者心孝子有托幽堂之銘非敢曰能庶效寸誠迨此
祥日敢告衷臆公靈不昧尙或歆格

祭閔公紀 鍾顯文 庚申

我李公閔簪纓清族在朝在野與同榮辱兩家交契
爲世先數文貞忠憲公我同祖忠文文忠與忠肅公
若弟若兄非直臭同暨我文正亦粵貞菴同堂師弟
道義相參以若舊好幸又同庚長而同研寓亦同城
顯晦雖殊所同者心卿班布衣名塗疎襟至老不變

其淡愈味疎戚踰親賤處忘貴誰料西節遽以樞歸
停舟一哭我淚盈衣泉下多朋前遊如昨日月幾何
祥期奄迫病枕黃岡草草短誄遙陳膈臆冀歆我解

祭趙仁叔 鎮宅文

歲次丁巳十月近故觀察使趙公祥日漸迫其友人
三州李采方在中州任所遙寄數行之誄四種之奠
使兒子光正謹以十九日干支就而薦之于靈筵之
前而讀以告之嗚呼我初見公于碧城衙溫恭端詳
愷悌文華聯床對讀亦旣踰月荷堂守歲薇山賞雪
自是結交如蘭如芝泮庭從遊詩酒淋漓有才必達

果符宿料蓮榜桂籍一時輝耀非直也滿難平者事
世棄君平君平亦棄公湖我峽十年相屏歲一入都
公駕必命依依其面可數其會聚散之理常也可奈
我有南麾公赴西灣云誰之報字字 君恩萬重山
川一般心期楓崖獨酌何日不思冰蘂勵操 華袞
增榮自灣而嶺一路澄清同膺餘緣異鄉勝集且置
禮貌公曰我執我固不敢公實忘形何遽衰白相視
拭青高處生謗美名多嫉凡今之人孰如其潔毋過
不及繫有所受豈無折衷憎茲多口夷清惠和妄滄
其真在公何媿 天鑑維神如水之閣公心如水不

以我愚經說媿媿歛其英華歸于儉約守身奉公既
慎且恪事事要好隨處必議惟其要好是以盡瘁六
月南遷矧伊炎瘴一善之別永隔厚壤溫溫色笑何
處復覲已矣幽明居然今昔孝子克肖哀彼樂熒兩
世五緬志事卒成不食之報可徵碩果文短情長庶
幾鑑我

祭李文之

學永文丁巳

幸而生同庚既又居同城况復同人之臭同隣作宰
自是相知益深於焉嶠南三載尺書續替面之資金
陵爲都會之地有病輒爲之訊遇事未嘗不議爲治

則綜明剛直其操也清勤儉約兄謂我以相近我謂
兄以難及猥以在前之糠粃不意并登於繡啓自禮
之善以甘爲醴雖不失同省勝緣猶恨夫自邇稍潤
逮夫湖府移陞遂蒙歷路臨別夫孰知青虎燈夕之
面已遽作黃泉長夜之寐痛矣吾黨哭愷悌之友惜
乎明廷失循良之吏嗟日月之駟迅奄祥期之已至
懷音容而莫攀曩一慟而餘淚甚矣吾衰孔路樊局
遙遣短誄替奠洞酌嗚呼文之乎尙饗

祭趙曾一 宗詰文

近故縣監趙公以丁巳二月十八日己丑入地戚弟

三州李采以其日赴葬所畧薦酒果哭訣于靈筵嗚
呼公我相知歲已幾何公所自出是我之家我則委
禽于公之門姻戚俱近情好彌敦風霜并載奈此睽
阻平生幹局嗟未展布薄施嶺表久屏湖陬大家規
範非齷齪儔尙記再昨秋冬之間江樓剪燭萬事悲
懽謂當摧頽到老猶未衰年顏髮少時志氣何遽窳
窳奄隔幽明物閒山裏屹彼佳城幾時復覲他生後
會奠此一杯長情短誄

祭趙仁卿 元詰文

近故蔡軒趙公仁卿氏旣亡之三年甲子七月二十

善集 卷十一
日干支其友三州李采縻薄宦不能躬操文復哭使
子光文代其行而往讀之嗚呼哀哉人之有姊妹之
婿婦之兄弟者何限而年紀或參差也聲氣或異同
也臭味或近遠也乃若赤心交歡至白首不貳鍼芥
鍾律之不乖鑿枘方圓之互膈古所謂管鮑之交者
世所稱姓不同兄弟者惟兄與我庶幾斯論不惟吾
二人自知如此卽世之識吾與兄者亦莫不曰倫鮮
是盖兄有實德實行使人各得其歡心無賢愚貴賤
故我亦得以從遊其間如蓬麻之相資瓜葛之相絆
在南澗兄以我而主處東岡我於兄乎館自夫詩筵

之雅集荆園之白戰以至朴淵石潭之搜尋七寶金
剛之遊玩未嘗不携手聯袂相與徜徉而爲伴是以
會時常多離時常少相期旣遠相與又信以爲吾二
人俱少年百歲在眼故不知此事之爲圓滿今劫灰
屢閱矣滄桑百變矣吾雖欲復爲此其可辦乎我年
十六入兄之闈先大夫退軒公以我有先故也愛我
實與兄之兄弟而無間旣獎與之又教訓之往往於
世故推遷朝廷益損前人得失自己舒卷許以布衣
而相難豈敢曰舅甥間知己盖所以蒙被賙如此而
自顧不才蔑學爲慙赧焉耳而乃兄則天姿近道行

華身集 卷十一
美內蘊雖其詞章少遜於文學若夫史論不下於經
傳其容冲澹其行溫謹平居應接無非天真尋常諧
謔都是雅韻真法家之賢胤昭代之佳彥也矧乎初
開亨衢妙歲發軔春坊玉署坐致清顯由是而進乎
錢穀甲兵彌綸黼黻之缺凡所謂儒者之本分以若
華閱以若瞻幹其將捨吾兄而誰先哉當是時先大
夫以雖進易退標望甚峻令季氏以聰明敏達接武
而晉門闈華盛簪珥赫炫士類倚重之舉世艷羨之
蓋兄雖才器兼備而胷襟則泊然若無朕外若疎宕
而內實綜縝人知與自期何驅不坦而不幸風樹之

哀未及二祥而人事遽幻矣生離死別老慈號咷海
島窮荒昆弟分竄門戶幾乎墜地親戚至於斷腕思
之淚迸言之氣短兄於是乎孤囚如羈萬念灰燼一
步不出戶而晝夜悚惕其憂人不堪而增益動忍蓋
有可以感神明而化愚悍者夫誠則形形則著理亦
不舛故天高而聽卑鶴鳴而聲聞乃於廣慶之日至
稱居謫之善臨筵發嘆特許生返自此寒食東風香
火有主斯晨斯夕母子相面誓將死而草結生而首
隕因念天道既雪霜以隕之則必雨露以潤之故不
自意奎韻 特頒如蟄聞震覆盆回光天日再見上

善身集 卷十一
天不吊 龍輶啓轅八域如喪蟻褥咸願嗚呼尙忍
言哉蓋自吾二人相識以來形從影襯以不欲一日
睽睽則怒如之心倏忽爲八易星霜之分散而及兄
萬死歸來則吾二人者俱已雪渾雙鬢矣雖不能如
疇昔之從遊至於書札往復殆無事不講無疑不問
凡兩家門內瑣瑣憂樂靡有不知靡有所隱論古今
人成敗事是非蓋多不謀而相準顧其氣像規模若
相不同而乃若言論志趣則自少小聞見實有所本
嗚呼言何可盡哉今且置水流雲空之離合自今以
往惟衰老同歸餘年依近孰謂少君之車未借伯牙

之絃又斷風燈斯世餘生悽惋夕照高堂何辭慰唁
以吾兄平日之孝心而貽憾於望九以令季十年之
阻顏而抱痛於割半是奚但存沒傷心亦足爲幽明
遺恨時則余適有膝下之疾痰兄病而不能視其藥
兄歿而不能拊其櫬連年二女之夭衰髮益白經歲
先集之役閒居絕罕悲不過一洩於哭寢情粗伸三
月之加免居然面上之草再宿尙未胷中之哀一展
我則負兄實多兄能於我無愠今當臨紙欲罄千萬
支則傷繁畧則嫌簡與其簡而少實無寧繁而罄悃
茲乃不顧荒拙洞說情懇然猶百不能掛其一端將

使千載之下孰知吾輩交際之深淺哉文字之托期在早晚幸而不死文識稍進庶幾使吾兄而不泯否乎後死之責惟是爲勉嗚呼惜哉

祭洪履之義發文

近故宜寧縣監洪公履之既沒之三年丁卯三月某日干支三州李采始爲文敘其平生從遊之樂與夫存沒之感哭以告之曰嗚呼我始覲子渭陽之膝其年幾何我八子七慈吹篠馳業亦同帙子時夙就其頌伊橘及冠而研館于子室匪叔也友如磁如漆于庠于類白戰非一有如糠前何曾駕軼靡遊不共靡

言不卒誰賊誰淡未或相失久而能敬愛不至暱中間離合亦幾歲聿思則書存會輒歡溢至老白紛蓋如一日慈諒其性恭儉其質外若疎坦內實纖密臭之不同亦無怨嫉幸一奉檄薄試刀筆龔召舊蹟是穀是率介未必隘明不過櫛旣廉而勤民懷吏怵鸞非所棲驥莫能逸而誰不若而不卿弼間縻 祠官屢陪 天蹕跡卑寵渥人鮮其匹召汝之夢竟符一疾窮達脩短天豈可必泉下故人哭送殆畢山居踴涼掩我蓬葦迨子之亡誰適爲出孝子闡美屬余行述非余爲文謂知也悉惡乎用情懼或浮實遲我一

華泉集 卷十一
祭奄及祥吉艇脯學醞愧非芬苾母曰余薄庶幾嚮
盼

祭李敬命 義肅文

近故開寧縣監圓嶠李公既沒之三年丁卯三月日
三州李采始爲文哭而告之曰嗚呼公友我仲我不
敢肩不我藐也樂與忘年自仲之亡益篤其契心乎
愛矣何日不會圓嶠之下南東其宅無朝無夜命酒
相酌我歌我棊我林我邱非我無朋從公于遊寒溪
楓岳最其淋漓公記其行我以其詩自我于泉間多
貽阻不阻者心四十年所聞公疾革子弟環侍有問

其友曰惟亮耳匪余之知公實知我白首踽涼誰與
晤者八勝之亭我往哭公宛然舊會風雪之中鋪筵
及几獨奈無知噫其不朽文在於茲閒淡古雅辭與
筆楷寧局於匠恥類其俳當世翼武不知誰居古有
割股今而見於母曰子職是爲行源常懼人知公議
猶存繫或泯滅于後何勸曩爲一吏不長尺寸清淨
之治文士何病惟孝友于是亦爲政城西安貧依舊
布衣介約其操疎簡其姿老而選余其喜猶狂旣類
將祥非余敢忘詞以相紉文祭則未公嘗愛酒母吐
我觶

祭俞曼倩

漢雋文

近故刑曹參議著菴俞公之柩以辛未十月十四日
鞠向于桂陽之下梧亭便此菴之垣前二日丁巳其
小友三州李采舉觴而哭餞之曰嗚呼夫人之友友
以其齒齒則雖同寡同者志而我於公志同齒否公
曰母齒余敢曰友盖自白猿重拭青眼班聯桂掖住
近松開餞春于東以酒以詩躑躅烟霞傳誦一時溪
亭講討亦一勝筵我肱其橐其文幾編駢花儷葉刊
落西崑錦裳玉佩上窺貞元涉于百家反之六經日
誦思傳晚喜考亭不謂我鹵以多問寡口觴筆玦論

著博雅文章經術其心若虛惟其謙謙是以有譽左
圖右書高冠博帶儼然危坐老猶靡懈高出於凡清
在其中公所贊我我歸之公今之睢陽五老同社我
題其帖實愧歐馬蹇衛相尋會輒真率遊從之樂其
竟如一我山我州筆札聯翩豈無他友於我乎偏我
歸自南公疾在床龍門絳帳其言也傷百世在前誰
識此翁梳我巾衍表我堂封死生之托故人獨有余
豈知仲公自不朽嘗記公菴今便埋此噫公友我止
茲一觴

祭旺林李公

行祥文

處士旺林李公既亡之三年壬戌十二月干支朔某日干支後學三州李采始赴哭于靈几告之以文嗚呼惟公宅同吾鄉地是賢村早歲樞衣文正之門文正伊誰卽余之祖一脉寒泉爲世規矩有來衿紳無遠無邇學非不精資非不美一事之誠莫居公右晝宵服勤如左右手是時文正久患風痺微公敏達誰識大意參乎若魯回也不愚真實心地淡泊榮塗文正曰嘉來汝贈詩公年二十以處士推同門艷稱一鄉瞻仰公拜敷衽曰烏敢當自哭山頽恐負文正持身若恟收心以敬不緩不急爲己益篤推及於人絃

家誦塾幾年秉拂于社于院師門型範儒學章準造詣之高非敢蠡測踐履之實蓋多心得天爵中樞良貴上善公則何慍知公者鮮江漢秋陽寤寐其思遺文埋篋盛儀稽祠抱茲耿耿未覩今年章徹 聖鑑橐餘俸錢 恩額纔宣集役方始恨不起公同此二喜後死之責何往非虞一部講說尙欠爬梳譜狀禮衡亦多商議以余之陋孰與共事公實弟畜我視如師浮沉蔭祿終孤遠期早晚歸山依舊榛莽冥途失燭俛俛何向我哭後人非我忘公短誄漬綿公庶監衷

祭柳生景漢文

歲癸丑九月云云柳戚君瑞病沒于客主人李采以其二十二日干支駕牛送喪爲設庶羞之奠使洪生龍普替奠而誄之嗚呼君瑞胡爲平生行而死歸君瑞與余戚屬不遠相知又數十年雖未及爲主爲客以償宿昔之願而其心則蓋相許也其約則蓋已久也逮余陞移一善公務少暇方將邀置府中待以杜書記焦先生之間矣不幸在途卽病下馬仍臥未能飲余之一盃啖余之一臠輾轉危殆遂作嶺外之羈魂始知君重陽自悼之涕若有先知而顧余之恨則

甚矣彼孤兒寡婦日望君安稅之信而去時鞍馬忽以素櫬而歸嗚呼君瑞何命之窮何年之嗇死固命也死于客亦命也然非余之故君必無此行然則雖謂之由我而死亦非過語而治喪送靽不能稱余之情適余有所拘又不能撫柩一訣於是乎余之恨益甚惜乎如君狷介之性精約之操何處得來洪生君之所親也酒肉君之所嗜也其尙能諒余之心而歆余之奠

祭外舅參判退軒趙公文

歲乙未十一月日外舅退軒先生趙公之柩將歸于

華身集 卷十一
窀穸前三日于支子婿三州李采謀其婦奠以菲薄
乃爲文再拜告訣于靈几嗚呼痛哉先生以二憂先
生爲之祖悔軒公爲叔得家庭忠孝之傳嚴陰陽淑
慝之分嘗不撓尺寸是以忍痛含冤難進易退立身
餘二十年在朝不過數百日其言論風裁卓然爲士
友模楷而方將擔荷以世道之重也則其一身去就
存亡實關國家盛衰之運繫賢邪消長之機是知先
生之喪天也非人也然當先生之奉尺函叫九閭也
雖風霆以震剝之雪霜以凌轢之尙不能使先生隕
其身處坎猶亨動心忍性蓋天意若將以有爲也於

是乎返故山遂初服讀得許多經書看得許多義理
德業可推以廣矣志事可卒以成矣乃花墅之拜面
無幾而錦城之旅櫬遽歸使人之所以期先生先生
之所以自期者竟一皆反是所謂天者又不可以必
耶此小子之所深慟而雖先生亦豈無恨于是哉况
小子早歲孤孳得先生爲依歸先生之視小子如子
而眷愛之常篤提誨之常勤期詡之常深則小子於
先生義雖舅甥恩兼父師今小子之哭先生實自悲
其悲而不暇悲先生之無命也嗚呼若先生之德之
行之文章昭朗英發之儀和仁雅潔之性明透敏達

之見剛方爽逸之論蓋在人耳目卽小子何敢迷焉
嗚呼其臨絕之詠遺戒之辭益可驗先生所存而存
順沒寧又無愧于古君子正終之義吾知其奕奕精
神必在環東岡林壑之間不獨歐陽永叔爲能然也
嗚呼芝蘭萎矣棟樑摧矣煢然斯世誰適爲命詩曰
人之云亡邦國殄瘁嗚呼痛哉

祭外姑貞夫人安東金氏文

維歲丁卯四月一日干支三州李采謹以菲薄之奠
哭告于外姑貞夫人安東金氏靈筵曰嗚呼婦人之
媿以順爲正存之爲德發之爲行余以館甥窈識夫

人柔嘉有儀其色也溫婉婉之聽不待姆教無違之
戒厥有禮醮以孝友性槩幽閒容夙夜以敬惟夫子
從宗黨曰仁婢使曰惠終和且吉何福不介爲宰執
婦爲學士母之西之北亦旣餉厚東岡之陂一區林
壑聊樂我員有翳其宅名高身退疇不敬者五十三
載天畀純嘏理有乘除忌在盈溢杞城忽崩萬事涕
咽一時三罪丹書墨縲篋輿各散幾年無兒明明我
后覆盆回光後先歸侍季也獨生回眺爲笑庶幾可
樂雖則可樂門戶非昔朝菜暮糲已三十年上半下
半何命之懸無喜無愠惟其所遇富貴患難若行乎

善身集 卷一
素動心而益隨分而宜讀書所難夫人能之我言匪
阿女中之士有秉彤管無愧乎史旣靜旣淑天然其
則凡百懿行何曾邊幅終日坐端如歸初載恭以莅
之至老不懈如石之剛如玉之潤卽驗于爲罔不由
順肆故有稱一是無瑕盛衰存沒獨奈天何有或過
城有來錯舛會著媻睦話悅親戚誠發於外其孚在
人自家爲遠殆無間言于以迎之于南于北樂此怡
怡曰歸無亟其接也淡其言也簡非心好之曷其有
款不以我蒙敬之如賓舖我絮我今老白紛歷歷悲
歡如夢斯遽自哭吾婦痛失賢助噫其典型類先大

夫資性之美肖我外姑我拜外姑如見吾婦真若可
見如拜我舅今其已矣何由更覲之德之儀泉塗永
隔封非不榮壽非不久凡我後死餘恨卽有兒還未
幾其樂方始憮然而化恹然如棄皓首血泣其容望
望胡不須臾以卒其養且余蒙佑門闈有光阿文擢
第阿正登庠上無告慶內無同歡豈曰無喜愴懷難
寬日月幾何奄及三燧旣春旣夏又迫生忌我初奔
赴殯歛之時以病以憂再來遲遲綿漬其薄邊實其
淡家人之思新悲舊感

祭姊兄徐公

翼修文

弟兄徐公之柩以丁未七月庚寅鞠而之玉山越四日甲午遷我姊氏墓而合封焉三州李采謹具漬炙之奠走哭于靈筵嗚呼公之委禽吾門已四十有二年然余始幼藐姊亡而相往來疎濶近又流落峽廬入城蓋絕罕而有時造謁輒卒卒不盡懷不謂千古在今日今日乃成永訣矣冲儀何處復覲雅誨何由更聞嘗記公日侍先大夫側親愛之心由乎中洞屬之容著乎外自灑掃搔抑以至設枕歛篋靡不身自服勞三十年如一日雖古所稱孝子莫過也然平生杜門自守持身如處子至親多貴顯而不一跡其門

宜公之窮而老也使翕翕炙手者觀之必不自知其可羞而將謂公迂且拙然所貴乎人者以其全吾所受之性耳彼喪其良貴以浮榮爲榮者何足貴也良貴在天浮榮在人公雖不得於人而得於天者如此則是可以不朽公也

祭弟兄鄭大哉元綏文

癸巳七月日三州李采謹具奠操文哭而告之于弟兄鄭公之靈嗚呼余幼失學尊公所憐日以書來於我家焉公時髻鬣長我三年湖榭巖庄對案精專間以嬉戲葱竹周旋謂我知深不以蒙顓朱陳之好再

結姻緣聚散雖多心期相懸迨余卜隣舊會重圓朋
友之齒出入與肩南岳看花北池賞蓮溫溫笑語絕
不修邊敦厚有風淳慤無愆詳約素履孝友青氈無
日失恃樂有父賢我姊云淑子女在前終和且吉何
福不延遘疾无妄經歲猶綿稗湯惟勤早晚可痊天
道冥漠人事推遷慟貽西河年止子淵苗而不秀自
昔已然之才之學命也迤邐樛月再明聲光逝川前
遊夢幻卽事涕漣惜死哀生其奈何天一酌致訣吞
不究宣

祭黃婚大中

基瓚文

近故成均生員黃君大中之柩以癸亥十月十二日
將引向報恩山下其婦翁三州李某薦以薄奠痛哭
而訣之嗚呼大中君年十六委禽于我我女女士所
鍾愛者妻子之合兄弟之翁父母其順君庶幾及早
年上庠何適不宜停鸞峙鵠滿前斑衣人方艷稱天
遽摧闕婦先夫後曾未幾月回笑爲眺二親何依包
輕特重孤兒疊哀理逾境慘行路酸鼻以君孝慈胡
寧忍此方君病時懼懼親憂猶日盥巾自春及秋疾
痛之極自視無恙過庭之步每飯必強何曾怛化夢
已先悟自罪不孝爲親在故不有至性那得雍容記

昔淹直 弘寢之中君以贄來曰父命也余笑而謔
誰敢當者自是情歡不徒區區燈炮月落徹曉咿唔
音韻洪亮文理長進宜壽宜達其始發軔自禮之善
自善而忠母曰離多盖亦遊從輕儇之步俚俗之話
我言逾耳君則遄改寬厚之儀仁善之性我言嘉乃
君則屢省力踐道理才周事物行勝於知做如其說
使君少試可展其步就使不顯豈無蔭路君嘗燕居
與兒輩言曰於岳翁受罔極恩是以視我如父如師
我則愛君同於二兒君於二兒齒差五三若鴈之序
若蜜之甘楓花佳節山水勝境靡有不借如形而影

孰無舅甥誰非友朋相信之篤非我獨能我麾西出
尊翁南宰雖則阻面書尺相代蓮榜之坼文與同年
門闌二慶樂事初圓坡館之迎屏阡之掃白牌欄衫
馬首雙導我心孔嘉其喜如何惟此一事餘生足多
解紱同歸若將源源忍言昨悲涕淚相看居然其祥
明日卽是明而又明君櫬南指不祭之痛送引之悲
老淚欲枯可奈同時才哭金女旣葬而返犢舐徒切
猿腸荐斷形存心死甚矣哀憊臨壙之訣遠莫能會
然有術忌計違合劔今且權厝春以永窆尸柩之見
後期在此爲言吾女以是爲企不病不寒可了此願

一杯送君格我方寸

祭金婿容玉

炳珪文

歲丁卯春三月日婦翁三州李采始爲文哭祭于金君容玉之靈嗚呼痛矣凡人有子偏於女愛惟其愛之必擇其對自君館我愛與女均非直也才最愛天真清疎簡淡寬緩沉默坯璞自成畛域莫測其容若思其言若愚坐必端凝行必安舒雖有同輩不敢媠謔誠以近道疑於已學維文與翰亦旣夙就曰庸曰學我爲君授味其所味不以書書且爲親屈從事公車豈若俗儕年少輕佻不耕不穫志不在僥有婿如

君其迷如何溫溫恭人其德孔嘉昭朗穎惠和柔雅吉如花方發未及乎實東床御瑟而五六霜且置君悲奈我猿腸青春如夢其跡惟君雖則哀死所喜君存間余歸山自詒伊阻有時見君如見吾女今而又哭曷不痛惜從此吾女其永無跡氣清數局古來卽然噫其俱死將奈何天始君病革我未往護迨斂而葬又失奔赴病恟天寒老聽子謁計與心違非余之愆瞻彼九老有松鬱青雖不同穴咫尺其塋人世之歡庶幾可續兩美相從其人如玉慰君慰女其在是歎禮服月滿不忍遙除湖榭一慟舊悲交並爲誰而

來不見其影具此薄奠我與君訣君其來歆我淚泉
微

華泉集卷之十二目錄

祭文

祭伯嫂安東金氏文

祭仲氏牧使府君文

祭仲嫂慶州崔氏文

祭叔氏教官府君文

祭仲姊金氏婦文

祭亡姊趙氏婦文

祭亡姊鄭氏婦文

祭亡室揚州趙氏遷窆文

祭長女黃氏婦文

祭季女金氏婦文

祭從子婦林川趙氏文

祭從子進士光裕文

祭姪女俞氏婦文

祭從孫璞文

祭宗人 綱文

祭庶族叔仲恪 濟恭文

祭庶族叔慎甫 濟慎文

祭縣衙土地神文

祈雨祭文 八

送痘神文 二

哀辭

進士洪君 憲謨 哀辭

成處士 德朋 哀辭

華泉集卷之十二

祭文

祭伯嫂安東金氏文

嗚呼我嫂何闕之美清翁文老暨三淵子寔惟其祖
庭訓孔嘉孝友嫺睦惠哲宜家記昔初來盛我門闈
兩世具慶疇不艷歎斑彩盈室有湛其樂俄然夢幻
忽焉窮獨歷歷傷心吞不忍宣肝腐涕血茲三十年
昔懼今悲胡天殊命憫余孤煢偏荷眷盛何有何無
惟酒食辦十載共爨人無敢間過實之獎不以蒙陋
莫謂我叔我依如母曩余西赴兒未髮燥携捨難適

護養易惱衆所瞻顧嫂則不憚我且保之曰於我館
經歲方還歸以提孩此意良厚非直我懷無親無疎
義洽恩周過輒欣迎傾倒如流筆札之工辭盡寸楮
裁縫之妙製合尺度不違自逸夙寤夜寐隨處幹局
丈夫多愧無子亦有慈母兼父教做三遷日望成就
何必已生庶其式穀樂棘之容行路慘目矧伊少婦
千里星赴病嚙如昨梧捲非故睠彼廉退寒泉之傍
先墓古宅隔數四崗域兆維新津劍猶遲雖則餘恨
行且有期祖載方戒泉塗杳杳情文短長酒涕多少

祭仲氏牧使府君文

維歲辛酉正月五日我仲氏牧使府君祥祭將行弟
采時在黃岡任所遠無以哭奠畧送菲薄之需使正
婦設爲餅果且爲文數行托鄭甥世禎以其前二日
庚辰替讀于筵几嗚呼痛哉歲末月正滯余湖跡舉
世一切同時二憾哀哀兄姊棄我何之承凶號咷有
淚盈頤何怙何恃早余不祿凡我同氣十有一哭其
哭伊何哭我之悲然余衰甚悲將幾時一身終鮮白
首窮鰥孑然孤寄此生何懽昔人有言晚生最憐是
余之謂益信其然永夜不寐感念平生盛衰存沒撫
躬自傷公則友于我依如父十載食貧八口仰哺忠

實樸約夙余服欽薄俗厚德今世古心其儀慤慎其
辭質直豈若時人徒尙文飾出典州府不求赫赫信
心做去其剛如石跋蹇何病我心無愧去後之思民
頌其惠公雖捐世典刑尙存阿憲移房阿正持門何
間乎體果食在是有孫克肖將驗餘庇旣葬而緬再
相揚紼豈不告哀未遑泚筆間叨桂掖旋移黃岡五
經使勅一直奔忙衰骸難敵歸思方切居諸之迅奄
迫祥月草草病枕和淚抽腸靈如不昧庶歆我觴

祭仲嫂慶州崔氏文

吾嫂氏淑人崔氏卒於回甲之歲甲戌七月今去其

卒時適五易月矣禮兄弟之妻服小功小功五月夫
弟三州李采乃以服盡之月朔日丁巳命塋之婦設
餅果數品薦而哭而除之畧道其盛衰存沒之感而
曰嗚呼始淑人歸吾仲氏也吾兄弟姊妹固已未能
全盛矣而猶有諸嫂與吾婦存每歲時祭祀婚姻之
夕往往內集尙可以悅情話而慰孤懷不幸人事嬗
變哭之又哭居然四十年間送盡泉下而淑人又歿
而下從其倖存者姊妹兄弟惟余諸嫂惟泉嫂一人
耳老鰥兼以終鮮宿悲多於新歡就使淑人在者其
存無幾顧亦何樂淑人事夫子餘二紀小心承奉罔

拂一言一事非順而能之乎愛其所愛使前配子女
殆不知其異顏非惠而能之乎順且惠婦人之爲德
而淑人有之夫惟惠然後人慕之順然後天祐之是
故夫子宜之宗黨稱之婢僕懷之前後之官以州夫
人者再以太夫人者四去歲冬今年春阿憲阿正又
聯武而登第榮塗方亨而諸孫繞膝日嬉戲以供含
飴之歡是其報施之驗有不可誣如此夫何一疾自
三數年彌留浹四五朔寢劇竟不得延及遐禩備受
純嘏以娛其晚境也此余所以爲淑人惜而又不能
不戚戚於存歿盛衰之際也然阿正吾子也而淑人

子之阿憲夫子之子也而宗祧是托幸而俱成立矣
使其將顯者益大而未顯者承之已生者皆全而未
生者熾焉則是所謂否極而泰貞則復元而不會若
疇昔之存且盛者區區蘄望於方來亦惟在是庶幾
天祐淑人淑人佑子孫以羸其後以永享厥祀

祭叔氏教官府君文

維歲次庚寅閏五月日叔氏教官公之柩將鞠向于
駒城前二日辛酉舍弟采謹具餅酒之奠操文而哭
而訣之曰嗚呼痛矣嗚呼已矣使公而至於此者天
耶人耶吾祖先積德累仁宜其受報于天而其後也

不盛而衰有如公仁孝之行敦確之性而卒亦不免於天此殆時運所關奚但一門之悲而已也在昔壬申以前吾兄弟姊妹十有二人繞父母膝下知其爲至樂且湛而不知世間更有可悲可哀之事未幾而先君子棄諸孤二姊亦相繼不起乙丙之歲又連哭兩兄其他切已之憾亦間有之凡世間可悲可哀之事無不備經而前日之樂且湛者不復得矣身世之孤子情界之慘毒固非人之所可堪忍而喪威之所震剝悲懷之所疚傷公與余一時病徂濱危者數人或虛傳爲已死公亦自分其必亡而丹溪老人能使

吾兄弟復起一年二年諸證漸祛庶幾節食服藥以復其常以扶持吾門戶怡愉吾母氏之晚境矣吾又不天母氏捐背嗚呼痛矣嗚呼已矣孤露餘生惟兄弟相依居處同出入同以至杯酒翰墨之場而未或不同間余棲屑或不免離違而赫蹄相續寵以詩章致其依戀之意對輒欣然笑語間兼諧謔人之見之者不知孰爲兄孰爲弟苟非公至友而篤愛亦豈能如是也齒差以六序居其五天倫之樂兼以師友讀書有疑難處必問作詩有敲推字輒質楓花良節山水勝境亦靡不聯展出遊又嘗約以早晚卜隣而居

日夕團圓以終吾餘齒矣今乃冥然長逝棄余如遺
多少商量盡歸於甕者之筭或者九原之下待父母
兄弟續前日之樂且湛者如在人間時而不以我爲
念耶自哭公後身世益孤孑情界益慘毒向所謂可
悲可哀之事至此而極吾非鐵爲肝石爲腸者將何
以堪之嗚呼痛矣嗚呼已矣公胷次坦蕩言議爽直
與人交披悉心腹客至輒具酒肴而樂之不以貧窶
而或廢無貴賤少長咸善遇之然見人之過則若浼
浼言不避忌諱人或責之以過激而不聽也於事一
有所執則雖賁育難奪其志實有千萬人吾往之意

近年以來雖貞疾沉綿薄官潦倒然人以志操之慷
慨氣像之繁華期其壽而遠到而倏忽三十二年光
陰了盡於喪病憂憾中所成就止於成均進士內侍
教官乃使孀婦孤女煢煢無依身後之淒涼甚至於
妥靈無所彼蒼蒼者胡寧忍此幸而有遺腹天道在
庶幾生得丈夫兒留公之典型主公之禋祀以徵碩
果一理生人之所望逝者之自慰惟此而已嗚呼痛
矣嗚呼已矣記昔常時公病則曰我死身後事爾自
擔之我病則亦曰公在何憂此皆一時之戲言故聽
者亦一笑而蓋其家庭間相得之喜相與之懽不但

在乎志氣之相合年紀之相近也今也不幸偶與公
前言相符而若有先見者存吾死則已未然則其敢
曰戲耳而忽之也吾與仲氏在庶當竭力謀所以不
負尊靈而寬譬語窮提恤力綿嫂氏與二女將何能
支保成長耶嗚呼痛矣嗚呼已矣駒城之寒泉吾屢
世先兆而伯叔二兄之墓亦在其間矣公與余生長
於此而間住城第每四時省掃必聯轡登程渡西津
由直谷或乘月而行或冒雨而稅有時呼韻聊以遣
懷矣讀書之臺古跡尚存聽溪之墟春草已沒而人
事之變遽至於此公今鞞而歸余亦服其服而隨其

後遵舊路而行焉此何行色此何情境簫谷之阡距
寒泉不遠而邇魂無不之則庶慰於冥冥之中而吾
今忍以公載之玄棺葬之深山其將指四尺土封而
曰是吾兄之宅也奉一片木主而曰是吾兄之魂而
已乎其跡愈闕其情愈憾吾雖欲不悲得乎公之才
之行之美不忍泯沒無傳將欲爲狀請大君子一言
以圖公不朽且取篋中遺詩謀與數朋刪定精寫一
冊留作家藏而惜乎散佚殆盡梅花聯句棠棣雜詠
亦無有存者矣然卽其少猶可以知公又何必多乎
哉嗚呼痛矣嗚呼已矣嘗見農翁祭子之文有草生

花發則思風清月朗則思事有所感物有所觸無往而不思讀之令人墮涕今而思之益知其言之可悲而可謂善形容悲者之悲矣滿腔之懷悲不暇文吾於公亦當誦其言而自悼而已公亦有知尙或自悲其悲而不暇悲生者之悲耶平生相友之意若將一日不可離而至於存沒之際旣不得相見日月又迅祖道將啓千古之訣在此一觴嗚呼痛矣嗚呼已矣

祭仲姊金氏婦文

歲庚申月正之八日卽我姊氏淑人李氏旣亡之朞而據禮將撤其筵几矣前二日巳未家弟采爲文數

行哭而告哀曰嗚呼吾兄弟姊妹十有二人昔何盛也今零落盡使我孤寄人世者又何哉昨年春一番劫運乃往牒所罕我仲氏與姊氏相繼棄我而逝存者惟吾與季妹耳然季妹雖生而猶死不足齒生人之數余於是乎終鮮而非復舊日之湛樂然則可哀在我而不在我姊氏也然余亦白紛如矣早已孤露晚作窮鰥震剝疚傷其中則愕然也暮景將頽餘日無多幾何而不相隨於泉下復侍我父母復會我兄弟姊妹融融洩洩如舊日否乎嗚呼我姊氏一生清貧困於米鹽之愁固吾兄弟姊妹所共嗟傷而得年

六十餘膝下有二丈夫子世所稱壽富貴多男子所
不足者富貴耳然彼富貴外物也不得亦何病間嘗
一爲縣夫人備享一半年官供是亦未全窮也世之
婦人之不如我姊氏者亦多矣况與夫子如鼓瑟琴
老白首偕樂及其亡也使夫子檢送終之節切思良
之悲語余以潛德托余以幽誌得於夫子如此則其
賢尤可知是可以慰姊氏也耶柳村之阡距泉源生
長村十數里而近魂若有知應無不之然前月余一
往哭之不見其歡迎不聞其笑語已矣乎謂其無知
則不仁謂其有知則不知是將置之於有知無知之

間歟

祭亡姊趙氏婦文

我姊氏孺人以丁未正月八日亡其三月甲戌自紫
霞居第鞠向陽智之古倉山下將以丙子日穿其夫
趙公之墓而祔焉前一日乙亥道過寒泉谷口舍弟
采方居是洞乃具酒饌出迎于路左奠而哭之曰嗚
呼痛哉嗚呼哀哉維茲寒泉我祖攸基我與我姊生
斯長斯邱南水北慈吹篠馳矧伊幽宅五世于茲尙
記癸卯秋仲之時姊有省行訪我爲期道竹由陽載
歸不遲非日無會爲我泉淇此地重集宛其昔而涕

笑相對歷歷幼嬉繞封之哭有血其洩依然一夢倏
爾五朞嗟今之行此途胡爲曩以輜來茲焉以輜曷
不我館次于中遠先墓在彼我家易知若將展訪都
忽如遺雖則如遺靈應踟躕小弟迎哭萬事於戲貞
靜之德端淑之儀于何重覲我淚橫頤嗚呼痛哉嗚
呼哀哉昔我父母慶溢門楣斑彩十二其樂怡怡孰
非同氣年或差池姊與鄭姊如形影隨我於其間與
共携持壬癸不天荐我荼罹棣華先秋一半其萎傷
心存沒瞥眼盛衰嗟我行疎依戀倍之城西嶽北莽
蒼一涯豈不時會蓋多其離不謂我蒙有事則諮自

余此宅阻澗常貽歲一入洛卒卒其辭昨秋跨驢爲
訪湖湄神宇凋傷面樑衰羸我憂非昔姊不自危迨
病在笈奈無良醫哀我孔懷又送泉歧慟均割體愧
闕燃髭死生之別情禮都虧縱以我故謂我何其嗚
呼痛哉嗚呼哀哉姊年十五言結其縞以兩家好薦
蘿重施嗟不二朞奄成窮嫠哀生甚死莫慰我慈青
年晝哭疇不齋咨在凡猶然况言吾私賴賢舅姑時
其寒飢獲延其生三十年垂擇宗于南非樂伊噫雖
有兄弟獨奈無兒簡以御柩井井其治薶採旨蓄靡
不有規夙寤夜眠不已神疲所喜式穀亦旣舍飴過

華身集 卷十二
境何論晚福惟宜事乃謬悠何命之奇古倉之阡雨
露方滋穀異死同靈或不悲千古在前我尙然疑抽
腸和淚讀以侑詞有知無知冀歆我卮嗚呼痛哉嗚
呼哀哉

祭亡姊鄭氏婦文 乙未

繫維我姊女中之士克遵家則不離閭軌淑惠溫順
猗其質美孝友敬謹嗟行之懿蕙蘿所施瓜葛重庇
法家佳婦大閔賢嗣兩美之合何福不以承尊舅愛
宜君子志線紉之工酒食之議言若不能蓋莫不備
聽于宗黨暨乎僕婢咸推其德一辭不貳記昔盛時

門闌繁祉父母俱存兄弟十二伊余與姊差不多齒
有斑者衣載共其戲言笑嬉嬉爛盈室只凡推多福
先數我李虧盈互乘家運中否煢煢含索忍言壬癸
嗟我孔懷亦半泉隧先庶藉餘福是冀胡不悔禍
城崩于杞哀哀晝哭巷南之里飽艱茹痛人鮮其比
誓將下從于厚壤裏獨奈欒子維女與子逝者之托
亦惟在此死固如歸行將有俟曰西曰南惟舅命視
隨之于官蓋非獲已兄弟云遠雖女行是花樹泉源
實勞夢寐疾已沉沉惟毀之崇如火潛燃如水漸漬
屢阡于危遂不復起凶音忽到遺札並至九原千古

一別四禩維天有郡馬駕青峙夫子之藏賢姑孔通
柩以歸來此焉宅耳湛樂重洽幽顯何異若將迎拜
我馬南指旌翼徒倚音容永闕一慟嗚呼萬事已矣
維忠憲公暨文正謚延之有期行莫留止嗟臨壙訣
職茲罔遂轉頭之頃忽焉易燧物無不榮維夏之始
一去無歸獨我賢姊譬彼行邁徒勞延企爲此餅酒
云誰之饋小弟長嗚徹天徹地

祭亡室楊州趙氏遷窆文

已未四月四日夫李采破其淑人之藏翌日出柩將
以十二日庚子就上數步壬坐之穴永窆前一日已

亥草數行文哭而告之曰嗚呼淑人曾何處去今何
處來其來也旌翼相迎窀穸重開余方與子女偕集
有若候行者之返家獨奈德容無覩笑語無聞惟有一
一玄柩在堂嗚呼是果吾淑人也耶昨年權厝固一
時之計也不料浮圖舊坎雨雪瀦匯因緣浮土滲入
橫帶雖水不滿一二分時不過八九朔乃使吾淑人
之體不安於濡濕之槩是余不慎之過亦由余不察
之致驚隕慟恨寧有窮已何幸尋源及坎明知其浮
土所崇然後釋疑開新基而治新壙土色燦燦而成
斑文山勢井井而爲丙向自此永安斯宅待余早晚

同穴庶幾不悲者無窮期而將與子偕樂嗚呼淑人
知乎不知乎自余之喪淑人無往而非感懷去年秋
過龜潭有詩曰長淮疎雨夜無眠歷歷悲歡四十年
到曉傷心孤鴈響清霜叫侶度江天冬間出屏山哭
墓又有詩曰嗚呼嘻矣已焉哉漠漠重泉去不回風
雨屏山三十里觸寒辛苦爲誰來今年春過泉谷舊
廬又有詩曰嶺湖宦跡十年春何處青山葬淑人同
去獨來惟有淚空堂依舊設屏茵只此數句語可以
知余之懷事聊爲子誦之以代挽誄嗚呼痛哉嗚呼
哀哉鑑余之悲歎余之盃

祭長女黃氏婦文

歲壬戌十月十一日己酉吾女黃氏婦病不起當日
而襲第二三日小大斂第四日成服並如禮其翌日
月半之奠老父華泉子不勝慘惜痛毒之懷立草數
行文哭之曰嗚呼吾女汝果死耶死生有天吾不知
汝之必死而必欲汝生者是將謂不知人乎不知天
乎始汝病於虛瘁余爲率致家內凡所以飲啖之具
藥餌之方蓋靡不用其極冀或遄復而經夏徂秋如
水益下終使汝不免於死是知死病無良醫而人力
終不能勝天吾於是雖不敢怨天又不敢尤人而實

書身集 卷十二
不知所以爲心也向汝之病革也汝舅謂余曰入吾門十三年未嘗見疾言遽色又未嘗有違拂吾意者又曰祥麟瑞鳳世不恒有無怪其死也言訖汝舅泣而吾亦泣死之日又哭曰一人云亡萬事瓦裂殆吾祚薄而致然汝之得於舅如此則其得於大中又可知况大中素寬厚仁善宜室宜家如鼓瑟琴膝下有五子女而昨年又早登國庠不可謂不得於天而獨汝得年未三十夭嗇至此者其故何哉產固婦女之重病而多產則易敗曾已驗於汝母而又見於汝矣嗚呼吾與汝母常憂弗子晚而始舉汝汝又清明端

淑及其長而嫁也德容咸備故吾於汝兄弟中最鍾愛汝不但以類已也汝母死五年而汝又死縱有汝諸弟在以汝孝心其忍於詒憾耶汝之柩不久於此將還舅家又將鞠而之湖外骨肉歸復于土從古所悲吾於此益不禁聲淚之徹天汝其聞耶不聞耶痛矣痛矣哀哉哀哉

祭季女金氏婦文

嗚呼哀哉嗚呼惜哉吾女金氏婦以今年癸亥死距其生丙午十二月十八日得年厘十八然丁未之春已屆於前數日則其實十七也何其促也其十月之

葬也老父華泉子臨壙而哭之慟忍以其昭朗愷悌之儀敏慧柔婉之姿孝友溫慎之行埋之厚壤及歸而視其家無非平日陳跡然獨無一箇典型可傳於後則其實亦無跡也此余所以哀其生惜其死而不忍忘亦不忍於思也既虞而卒也余忽忽無寓心處乃以十一月重尋寒泉之故廬爲其忘哀尋理舊書而清晝應接之餘永夜呶唔之暇有時孤坐翻然而驚心森然而在眼者皆其慈其伯之跡也十年歸來萬事謬悠鹿車未借猿腸已斷此余之所悲恨愈久愈切而吾女亦生而呱泣於斯幼而嬉笑於斯稍長

而行且走又於斯其器服之所餘尙有標其名而識之者所以欲忘之者適所以助其思而殆同日中避影無適不然自今至死若之何其不思歲色又駸駸暮居然至十二月而其生朝在前自生朝距其死已百有旬有二日其爲泉下人亦七十有餘日嗚呼吾女吾其可以忘之乎寂寞荒山一去無歸者何也夢寐之間一二相接而亦依稀倏忽不似其生時者又何也死生在天固無如之何然苟其死也痘疹死病也死於曩歲之痘無不可死於昨年之疹亦無不可而乃以今秋死於尋常感寒使老父徒勞十七年鞠

育婚嫁者是又何也然既嫁而從夫故我服雖降爲之朞而杖者容玉也又將練而祥而禫儼然具三年之體而喪之以禮祭之以禮早晚容玉生子又將母之而世祭之是吾女無子而有子也然則其賢於在室遠甚此足以慰逝者乎其墓距城闈三十里以終南爲案終南之下是吾家耳天雲地水之靈宜無不之而隔蹊東一喚地容玉之高祖考郡守公祖考判書公左右位焉容玉之伯又藏其下神理旣愜人情無憾此又足以慰逝者乎先祖妣諱辰後生朝一日故闔家齊疏不敢飲饌而爲樂朝晡以數器饌饋之

於吾心常悵然也今則已神之祭以殷奠禮則有據故托冢婦之在京第者設爲餅果庶羞而其奠也旣無以一哭又不忍無一言余故口呼爲此文泣涕而送之使光文光正往薦而讀之嗚呼吾女何命之嗇觴豆旣陳歆我無射嗚呼哀哉嗚呼惜哉

祭從子婦林川趙氏文

已巳四月從子婦林川趙氏病不起其五月十一日自泉西啓鞞十三日抵屏山山下將以十五日未時就吾夫人墓隧下十數步地葬焉其夫之從父華泉翁爲見其入地先已到此矣及其柩在世欲一爲文

哭訣而悲聲滾擾至今未遑也適月半之奠在是日乃以草草數行畧道痛惜之情讀以告之曰嗚呼哀哉汝之入吾門今十八年矣以汝夫出後吾仲氏故以禮則雖從父從子以情則實爲舅爲婦况汝淑德婉容庶無愧乎女士故余愛之猶吾女重之猶吾子而汝又事余必敬必謹盖未嘗見一言一事之拂吾意者且自搬居以後垣屋相接無異同宮汝夫兄弟日侍吾左右汝之子女爭繞吾膝下團圓欣滿殆不知汝夫婦之移房也謂將永享此樂以慰吾晚年矣今汝捨我而先逝遽使我回笑爲哭轉盈爲缺白首

作此行忍見不忍見之境理逆孝虧豈汝心之樂爲哉抑大限已盡無奈乎天歟將歸侍吾夫人之側而留待吾無窮期之歡歟汝病累易月沉苦而謂是婉後例證不知其十分危也只以蓼料濟其急而不能盡心力而救之此實餘恨也汝死未幾汝之第四女溝痘不幸化去此又余慘怛也彼無母諸兒伶俜散處將誰恃而爲生痛矣痛矣汝其哀憐而保佑之否乎千古之訣其在今日矣汝姑歆此薄奠聽我悲辭嗚呼惜哉

祭從子進士光裕文

華泉集 卷十二
歲壬戌十二月朔朝從父華泉翁始爲文哭祭于亡
姪進士之靈嗚呼痛矣自我祖先德積仁累而孤其
族無若我李噫叔氏亡忠肅無嗣我始棟汝驪水之
涘同祖晚悔派分全義天作之倫入承其祀祖我文
正父我叔氏周旋出入凡厥動止惟數之故以我爲
揆居養之久其進不已外若氣短其質則異愷悌慈
諒人孰不喜視我猶父我實多愧旣冠旣娶成立是
冀青春上庠若將展驥其如命那橫途之至知我者
存天鑑孔邇雖則孔邇爲世之枳譬若春榮嚴霜忽
被自放郊廬讀書養志微汝之孝嫂其已矣半生窮

命四時清淚怡聲惋容間以嬰戲分思服勤誠不違
侍鄉隣嘖嘖幸哉有是一飯再飯惟其匙視何必已
生所喜穀似不獨行源其本有自杜門自修幾二十
禩非敢曰學我自樂此法門佳胤衰世良士課圃力
田以甘以澆母曰嘉哉叔曰唯唯人無間言世有公
議誰之不如而後糠粃我有良貴浮榮徒耳其資溫
玉其心淡水剛以濟仁事有條理我病且老謂汝當
恃身後百務是仗是倚一疾无妄胡遽我棄而汝喪
葬令我措置天理旣倒人事難擬以若行檢以若操
履而年不永伊誰之使兩家三老惟有涕泗矧伊我

書集 卷十二
嫂奄奄西晷今適晬辰未見壽觴誰寬其心爾婦爾
姊西園一杯流光三燧頽然之容何由復起行將禫
吉迭遷世次忠肅之主其承入地計其年數仰其德
懿嗚呼安歸忍觀此事肅祖之思益恫汝死而汝不
食其報在子仲季經疹伯也趾美莫日無天余拱而
俟我歸自西初服云遂將以養閒以送餘齒黃女之
憾添我衰悴此生何樂百年如寄迨此祥月我哭汝
几滿腔悼惜說與終始有知無知一涕一字

祭姪女俞氏婦文

大齋俞先生有冢孫曰常柱五汝余愛其精詳以兄

之子妻之及長頗好禮有法門繩墨不幸官不過一
縣年不及中身而卒知不知咸惜之既三年其妻李
氏又死獨有二孤持服纍然守廬嗚呼可悲也已其
季父華泉翁老且病既替而往哭之猶未有誄也今
大祥已迫靈筵將撤前一日癸酉五月小晦具酒果
爲數行文使從子光承替奠而讀之曰嗚呼汝幼而
孤所仰恃而爲命者惟吾嫂氏嫂氏所以相依而爲
生者亦惟汝耳備嘗哀苦恭受教導年十四而歸五
汝時五汝兩世具慶門闈甚盛俞先生又以汝爲吾
祖文正公孫益愛重之兄弟既翁父母其順汝於是

方知人世之歡而殆若無過境之悲也理有乘除事
乃謬悠累經喪敗至於五汝之亡而門戶非復昔日
矣嗚呼死固自慊生亦何樂而汝之強進粥飲延至
三年之外者誠以孤兒弱齡或恐難保其脆質偏慈
老境不忍重爲之詒憾焉耳然其欲不死者曷嘗以
必不死爲心哉特不以必死爲期而死則死不死則
不死一聽於天而已昔吾姑母亦入俞氏之門爲知
守相公冢婦早寡而決意下從文正公哭之曰以汝
剛決之志猶能宛轉承順泯其貞烈之跡終又曰使
汝有一箇遺孤必不至於死今汝之始初所執雖若

有不同者然蓋亦文正所謂必不至死之義也至其
畢竟積瘁之所祟也至哀之所傷也而潛銷暗鑠以
至於死則實未嘗不同也余於是知汝之識大體而
又能順乎天泯其跡如此汝性端方簡重絕無時俗
簪珥之態往往法度之言森然也雖五汝不能狎而
易之余於是知汝之賢而不愧爲女士也如此汝於
嫂氏油然有深愛凡所以事之者不以已嫁而少衰
書尺候問殆無間便飢飽寒煖靡有遺念每恨不能
爲男子以盡其心間嘗以書屬余曰吾父之墓松檟
已拱微季父誌之誰知吾父者余悲其志而嘉其誠

遂投涕而泚筆余於是益知汝之能孝於父母如此也然汝閨閣中人也非余言之又孰知汝之有如是資有如是行而其窮乃如是耶雖然汝則猶能有兩箇男子上可以奉四代之烝嘗下可以傳二姓之典型其勝於吾姑母遠甚庶幾以是自慰以羸其後也耶嗚呼近余憊甚疎於筆硯不能長語惟汝有知歎此一酌

祭從孫璞文

嗚呼自汝父死余之疑於天道蓋久矣然汝父猶有三丈夫子庶幾吾叔氏之後繁而或能昌其門也今

汝不幸而又死而又無子而又年不及汝父何理之錯愕如此汝伯方奉檄而赴湖縣汝慈以板輿就養汝季隨後而去汝獨何往而不返使汝婦叫號穹壤抱女而泣若窮人無歸也昔韓愈氏自道其哭人三世而余則自忠肅夫人以下哭汝之五世古人長年度世之願是誠何心嗚呼益可悲也顧余衰甚已廢文字之役而適滯東峽旣無以更哭二祥將畢千古在前吾安忍無吾一言乃草草構數行道得哀死哀生之情若汝資性言行有不暇言汝尙克聽之歎我一觴嗚呼惜哉

祭宗人綱文

戊戌云云李公汝常甫卒于箕城之幕府其宗人采
方以永柔縣令到營下撫屍而哭之慟既斂而載之
以第四日癸未治送于故土設為酒果餅饌招魂于
大同江邊而侑之曰吁嗟乎遠途胡為乎來些生行
兮死歸從古哀些山淒淒兮江聲咽魂兮莫踟躕些
惟彼德陽之花田我李攸廬些塞雲兮關雪靈輜兮
好歸去些臨風兮灑涕卓有羞而樽有醕些

祭庶族叔仲恪濟恭文

丙辰云云族姪采方在忠州任所為文而送之使洪

君龍普替告于亡叔仲恪甫靈筵嗚呼天下之窮四
惟鰥與寡丈夫婦人各有其一其實則婦人之窮三
丈夫之窮亦三然有一於此尚謂之窮况以一人之
身而兼有其三則其窮為天下之最嗚呼我叔早失
父母老而又無妻無子以涕淚為命無樂乎久於世
非所謂天下之最窮者歟噫嘻何命之窮何命之窮
昔我王父文正先生搬居寒泉四方之士如歸市於
斯時也叔館賓而待之各得其歡心入而左右我王
父就養無方至今道盛時事往往技涕以余晚生能
畧知我王父燕申之容者盖得於叔昆季為多今叔

之沒方再替矣慎甫又已作泉下人矣自此將誰與
語者余又搬居以來相知也益深相信也益篤無朝
無夜相往來源源不以余無似每有身後之托而一
出爲吏五歲在南遂失再會奄成千古余之負叔多
矣嗚呼我叔能知余心否乎公務少暇文不盡意替
奠一觴增我悲傷

祭庶族叔慎甫

濟慎文

歲丁巳仲冬丁卯日采官中州倩姪兒告亡叔誄曰
面上土草再宿嗟慎甫聰明姿疎狂樣何由覩纏纏
談辟辟氣掩重泉以若人窮且餓奈何天一寸心數

行誄靈庶格飲余酒啖余炙倘如昔噫

祭縣衙土地神文

我官于茲今幾一年以官爲家妻子團圓旣飽旣煖
縱荷君賜無疾無憂實感神庇爲此酒肴載陳微
悃惟神終惠申其佑眷

社稷祈雨祭文

德厚載物功大粒烝曰雨曰暘與天同能絲身穀腹
所賴非神報事無射于秋于春昨澇今暵冥應或忒
稻麥荐饑其崇也疫旣饑且疫如何不劉且置已往
餘望在秋奈此杲杲無草不黃山田苗槁水田秧痒

雲霓之望式日斯切其雨不雨亦既數月四野龜坼
一境魚喁誰因誰極哀彼三農良由不才猥當牧芻
我實自訟民則何辜是庸告急走伏靈壇蘇槁潤涸
正在神權膏澤一霈庶幾興勃之德之盛其永有述
社稷報謝兼祈雨祭文

守土非良速此蘊隆敢曰虔禱所冀感通俄然一雨
其應如響不論霏霏寔荷神貺如渴得飲舞我羣黎
曷不報謝聊以申祈隨沃而潤譬則釜焦適沾其槁
矧可移苗失今不需民命近壑神聽孔邇願卒膏澤

大德山祈雨祭文

天地之大德曰生山以大德名焉則其所以具生之
理而有發育長養之妙者不獨草木生之禽獸居之
而已是以其功用之及人自有不期然而然者而殆
將與天地同其大山之爲德豈不誠盛矣乎然山不
能運用其主張造化之柄者惟明神是已旱而禱雨
則雨潦而祈晴則晴作鎮一方夙著靈異獨奈何今
歲之旱百苗俱槁四野將赤而乍雨旋霽終慳大霈
使荒歲子遺之民又將相隨而轉壑求芻與牧是固
太守之憂而顧名思義寧不爲明神之羞茲將牲幣
走告靈壇神之格思雖不敢度倘得甘霖三日平地

一尺則謹當轉憂爲喜與百姓共祝神惠

龍湫祈雨祭文

官茲土而不績一暮餘而災再潦之後而又旱噫赤子之何罪祈社神而潤涸額嶽靈而蘇槁其猶病於浹洽矧可論於高燥淵乎斯而宅斯著幽玄於厥德潛雖伏而亦神雨則雨而暘亦徵往跡於邑老夙冥應之不愆何昔日之變化今直爲此慵眠窺靈湫而黜黑想神功之攸藏縱我民之若愬奈波臣之將亡虔余禱而薦牲庶奮翼於幽宮推靈渥於一霍慰余望於三農

社稷祈雨祭文

有國之重在社與稷民於是依乃絲乃穀曩雨知時康年有兆曰幪曰旆黍稷及稻居然流火久矣屯膏望切雲霓我心徒勞魯野失青周原將赤寧謫非躬何辜鄙屋牲醴齋誠敢以爲請蘇槁沃焦都在冥應

楊津溟再祈雨祭文

維溟之神列于祀典春秋降香有芬其薦其德維何日維潤下苟無其德是失職也旱而不雨此曷故焉雨而不洽若不雨然苛矣汚邪奈此高燥潔余牲幣虔余躬禱裊裊香烟水白山暝民生民死都仗冥應

崇德殿祈雨祭文

著異龍井肇基鰲山皇矣聖德寶籙千年地惟殷墟
民是周餘山川羣望孰非輿圖凡有所靈必赴前王
樂樂利利日於不忘去年之歉旣飢且疫忍令旱魃
又肆其虐密雲將集淒其以風往往霏灑與不雨同
薄言往愬于彼方社果然一霈如飲渴者四隣出耜
一時移苗芻矣汚邪獨奈燥高於皇陟降在帝左右
參贊造化寧不眷佑晚晚初庚浹洽猶未母曰其徐
以速爲貴迨此餘潤惠我翻盆則彼南畝咸頌渥恩

太宗武烈王陵祈雨祭文

東京中葉天啓聖神桓桓武王功莫與倫劔舄攸藏
于彼西嶽尙有英靈民頌遺澤於昭在上旋斡化樞
遇災必禱後后其蘇連年亢旱胡寧忍斯瀦澤俱涸
秧苗未移以若未移何望穫稻大昨驟霍羅壤偏少
歉運荐丁炎序已庚不念厥祖六部遺氓趁今一霈
尙庶幾種日雨之惠洋溢舊封鼓之潤之慰滿三農
潔我牲幣冀鑑微衷

送痘神文

歲庚子十月日前縣監李某爲其二男一女次第邁
痘旣癩而脹旣又膿而靨靨焉者痂而痂焉者落實

惟神惠不勝欣慶感戴之心茲當送神之日謹具餅
酒肴果數品侑之以文惟痘有神操厥化柄厥柄維
何天生是命人孰不痘痘亦有聖聖亞曰順家迓戶
迎癘脹膿靨各有期定孔昭者靈靡不肅敬有責其
臨時屬冬孟載先載後鴈序是凭自始及痲跨旬有
剩涼熱適宜可幸無病云誰之賜惟神爲政銘佩在
肝之德之盛苟欲報謝蕪語難罄彼其叢鈴邦申制
令我讀我詩聊代頌詠非我僭屑在理則正敢安主
禮酬酢與慶良夜方闌星疎月映偃僂送神虔其有
請既眷伊始願佑終竟俾壽多男富與貴僅繼有璋

瓦神其來更

送痘神文

痘麻疹者天下之通病凡爲小兒者所不得免而其
操死生之柄則等耳然麻疹歲不常有有到老未經
者往往有經而又經者故人或謹避而免焉惟痘則
必於幼孩之時而經焉然後順者多不順者少又必
一經而不再焉故人無敢圖避而其或倖免焉者蓋
千百之一耳然其免焉者非幸也終其身不以完人
自處之東之北惴惴焉惟懼其遘也有或晚遘免乎
死者不能十之一二此所以人願一經而又必欲早

焉者也况其所爲癡脹膿靨皆有定期而其順者又不待三朝之限若有神助焉爲厥父母所以感戴而報謝之者寧有旣哉是故東俗重痘重於麻疹迎送有節畏敬俱至是蓋孔昭之靈有以使之耳神之爲德其盛矣乎者非歟三州李某有小女年方七歲歲在戊申之夏邁順痘凡十有七日五月甲子送神其父作詞以頌神惠詞曰

哀辭

進士洪君憲謨哀辭丁卯

余與洪履之遊餘五十年每見履之四丈夫子列侍左右皆循循雅飭其伯仲三人又次第登庠余常面歎以爲吾外氏之慶未艾也去年履之死其第二胤憲謨日夜號哭竟不勝喪死其妻尹吾友仲舉之女也又不食下從死嗚呼何其酷哉雖然子死於孝妻死於烈有以見二父之教本諸身而著于家如此其不于父兄宗戚有光矣乎履之於是乎不死矣余嘗以是抵仲舉書而寬其悲也毀而死古人比之不慈不孝抑何哉世級寢降喪紀大壞高子之血滕文之

墨非惟無聞往往有鷄臠蒸豚之譏于時也憲謨出其過也猶賢乎不及余故曰其死也孝也况其平居愉色疾時禱神固有以大過人者而至今爲南邑人所稱道者歟憲謨字聖年死時年三十惜乎其短也旣父子同日葬其兄善謨弟彥謨等請有辭以哀之余非能重人者其行自不泯何待乎余辭又何用哀爲且夫辭者韻語與歌行等聖年雖死履之喪未卒顧以此時爲辭所不安也然古有死於喪其哀之或以挽誄挽誄亦韻語也是可以爲據歟哀聖年所以哀履之哀履之所以體孝子之心也嗚呼聖年辭曰

母黨有人猗嗟丰兮芝蘭之華何彼穠兮朗陵之家爽也龍兮子有黻衣婉其容兮胡天不吊罹閔凶兮雷山之哀亦孔邛兮巫陽下招薤露濃兮其過也孝禮則庸兮無謂無子令聞顯兮翩翩者離宛其從兮下上其窶若堂封兮青山翠嶺水溶溶兮有美其匹曰女宗兮辯貞爲佩爛琤琤兮我鞠良史載筆彤兮

成處士

德朋

哀辭

歲壬寅季夏成斯文德朋甫卒士友會者銘其旌曰梨溪處士噫此何足爲爲學者勸余祖文正先生之門文學固彬彬也然在弱冠得先生獎誦者蓋不多

人而處士其一也自是處士所自期人之所期待乎
處士不滴滴也今以處士之才之德湮沒巖穴間世
無有知者噫嘻知不知固亦命歟向也余挈家家寒
泉舊里距處士所住數十里近余匹馬候其疾又將
袖聖賢書就以質焉處士曰諾是余願也余早從先
生學日講四子諸書無小大註至今猶誦已言也然
老且死所學一無所施也規欲講其學不干先生之
孫子誰與講余聞其言悲之又冀免乎無聞也余歸
不月遽以訃書踵嗟乎計左矣余將終于無聞也歟
處士不幸是余之不幸不獨余不幸而已抑亦一鄉

所不幸去年哭玄巖處士今年哭處士顧吾鄉之士
于何其矜式也及葬敘其痛恨悼惜之意爲之辭若
處士資性之美志行之懿不復一二談其辭曰
石城之東溪水清且漣漪樂彼一邱噫惟處士之所
棲遲齋志與學于以葬之於斯公無自傷必有子雲
堯夫者知之



